

Oqaluinnarluni oqaatigineqartut atuutissapput

**Allassimasut:**

**Oqaluttuarisaanerput oqalualaatigut ingerlaavarpoq, soorluttaaq uagut siunissarput taamaakkumaartoq**

Kalaallit Nunarput sinnerlugu Island aamma Japan qutsavigiumavakka issittumi ilisimatusarnermut ministerit pingajussaannik ataatsimiinnerannut atatillugu qaaqquisutut aaqqissuussisuunerannik.

Issittumi pissutsit eqqarsaatigalugit uagut qitiulluinnartumik inissisimasugut ersarissumik malugisimavarput Issittup soqutigineqarnerata annertusiartornera, naak tamatumunnga tunuliaqutaasut ernumanaraluaqisut.

Nunarput, - Kalaallit Nunaat - Issittumi Siunnersuisoqatigiinni "the Agreement on Enhancing International Arctic Scientific Cooperation"-imi 2017-imiit ilaavoq, isumaqatigiissutissap oqaasertalersorneqalerneraniit atsiorneqarneranut.

Isumaqatigiissutit aqutissiutissavaa issittumi nunat akornanni ilisimatusarnikkut suliassaqarfii assigiinngitsut akimorlugit suleqatigiinneq, tamatumani pineqarput ilisimatusarneq, aammalu ilisimatusarnermut atatillugu atortulersuusersuineq, sumiiffiit tikikkuminaatsut eqqarsaatigalugit.

Suliassaqarfimmi tamatumani nunarput periarfissaqarluarpoq nunatsinni namminerme - aamma nunat tamalaat akornanni, - ersarissunik aaqqissuussaasunillu ineriartortitsinissamut, tamatumani Issittumi Siunnersuisoqatigiit pitsaasumik iluaqutaassapput, issittumi ilisimatusarnikkut siunnerfiusut pitsaasut aqutissiuunneqarnerannut.

Takusarpagut Issittoq Nunarsuup avatangiisaata peqittuunissaanut pingaaruteqaleraluttuinnartoq, taamaattumillu ilassilluarpagut FN-imi anguniakkat Silarsuarmi ataavartitsinikkut ineriartornissaq.

Nunat tamalaat issittumi ilisimatusarnermik ingerlatsinerannut malunnaatilimmik iluaqutaanissaanik neriuutigisatsinnik nunatta Danmark-i suleqatigalugu pilersippaa Nunat tamalaat akornanni issittumut suleqatigiiffiunissamut katersuuffik, Nuummi 2021-mut ikaarsaalernerme.

Suleqatigiiffiunissamut katersuuffik aqutigalugu naatsorsuutigaarput nunanit tamalaanit ilisimatuunik soqutiginnilersitsinissarput, ukioq naallugu misissuinernik ingerlatsisarnissanut, sumiiffinni pineqartuni innuttaasut aammalu sumiiffinni kiffartuussinernik ingerlatsisartut qanimut

suleqatigalugit ingerlanneqartartussanik, taakkuami ajornannginnerusumik akikinnerusumillu issittumi sumiiffinnut assigiinngitsunut angalasarmata.

Silap pissusaata allanngorarnera issittumi najugaqartunut takornartaasutut oqaatigineqarsinnaanngillat. Akiuussinnaassuseq kinaassutsitsinneereerpoq ukiuni tusintilinni siuligut Nunarsuup immikkoortortaani angalajuarsimapput sikup, uumasut naasullu allanngorarnerat malersorlugit.

Allannguutaasimasorli tassaavoq silap pissusaata allanngornera maanna nunarsuarmioqatigiinnut sunniukkiartuinnarnera, taamaattumik Nunatsinniit tikilluaqqarput; Sila pissusaata allanngoriartortup sukkatsikkaluttuinnarnera ataatsimoorluta unikaallatsinnissaa

aamma

ilisimatuussutsikkut suleqatigiinnikkut suliniutigineqassasoq Issittoq peqqissoq nunartaatigut aammalu immami nunamilu uummassuseqarnikkut.